



# নতুন আরেক যুদ্ধে মোস্তাফা জব্বার

কর্মগুণেই নিজেকে এক নতুন উচ্চতায় তুলেছেন তথ্যপ্রযুক্তি জগতের সরব মানুষ মোস্তাফা জব্বার। তিনি আমাদের প্রাণের বর্ণমালাকে যুক্ত করেছেন আধুনিক প্রযুক্তির সাথে। যিনি আলোকিত করছেন কমপিউটার বাংলা ভাষার ভুবন। দেশের ডাক, টেলিযোগাযোগ ও তথ্যপ্রযুক্তি মন্ত্রণালয়ের সদ্য দায়িত্বপ্রাপ্ত এই মন্ত্রী ও কমপিউটার জগৎ-এর উপদেষ্টা, নিয়মিত লেখককে নিয়ে লিখেছেন **ইমদাদুল হক**।

প্রযুক্তির সাথেই তার বসবাস। ধ্যান-জ্ঞান। ডিজিটাল বাংলা বর্ণমালার রূপকার। ডিজিটাল বাংলার প্রাণপুরুষ। বিজয় বাংলার নায়ক। জীবন যুদ্ধে হার না মানা বীর। যুদ্ধোত্তর বাংলাদেশের ডিজিটাল মাধ্যমে বাংলা ভাষা প্রতিষ্ঠার যোদ্ধা তিনি। এবার তিনি নিয়োজিত হলেন নতুন আরেক যুদ্ধে। এ যুদ্ধে বিজয়ের জন্য হাতে সময় এক বছরেরও কম। এই স্বল্প সময়ে নতুন বিজয় ছিনিয়ে আনতে ২ জানুয়ারি শপথ নিয়েছেন ডাক, টেলিযোগাযোগ ও তথ্যপ্রযুক্তি বিভাগের মন্ত্রী হিসেবে প্রযুক্তিবিদ মোস্তাফা জব্বার। গত আড়াই বছর ধরে প্রধানমন্ত্রী শেখ হাসিনার অধীনে থাকা এই মন্ত্রণালয়ের দায়িত্ব নিয়েছেন তিনি। ওইদিন রাতে ফুলেল শুভেচ্ছায় সিজ হয়েছেন। অবশ্য খবর ছড়িয়ে পড়ার আগেই ডিজিটাল

মাধ্যমগুলোতে বেগুমার অভিবাদন পেয়েছেন। 'ভাই' সম্বোধনে ৬৮ বছর বয়সী মোস্তাফা জব্বারকে স্বাগত জানিয়েছেন অনেকেই। তার সাথে তোলা সেলফি ছবিতে ভেসেছে সামাজিক যোগাযোগমাধ্যমগুলো।

শপথ গ্রহণের পরই তিনি ছুটে গেছেন নিজের হাতে গড়া বাংলাদেশ কমপিউটার সমিতির কার্যালয়ে। সেখানে সমিতির বর্তমান সভাপতি আলী আশফাক, সহ-সাধারণ সম্পাদক শাহিদ-উল-মুনীর, মহাসচিব সুব্রত সরকার, সহ-সভাপতি ইউসুফ আলী শামীম, যুগ্ম মহাসচিব নাজমুল আলম উইয়া জুয়েল এবং পরিচালক এসএম ওয়হিদুজ্জামান ও এ টি শফিক উদ্দিন আহমেদ ছাড়াও উপস্থিত ছিলেন টেলিযোগাযোগ সচিব শ্যামসুন্দর সিকদার। বাসায় ফিরেই তার নির্দেশনায় পরিচালিত ব্যবসায় সংগঠন ই-ক্যাব সভাপতি শমী কায়সার ও সাধারণ সম্পাদক আবদুল ওয়াহেদ তমালের নেতৃত্বে নির্বাহী কমিটির ফুলেল শুভেচ্ছায় সিজ হয়েছেন। একই সময়ে অভিনন্দন জানিয়েছেন প্রযুক্তি নিয়ে তার লেখালেখির অন্যতম প্রকাশনা কমপিউটার জগৎ-এর সহকারী সম্পাদক মোহাম্মদ আবদুল হক অনু। পরদিন ৩ জানুয়ারি সংবর্ধিত হয়েছেন তথ্যপ্রযুক্তির অপর সংগঠন বেসিসের পক্ষ থেকে। এই শুভেচ্ছা প্রদান অব্যাহত

রয়েছে। রাজনীতিতে নিভৃতচারী হয়েও এমন শুভেচ্ছা গ্রহণের ঘটনা বাংলাদেশে বিরল। নন্দিত ব্যক্তিত্ব গুণে তিনি প্রযুক্তি অপনের সব মহলেই সমাদৃত। মোস্তাফা জব্বারের মন্ত্রীত্ব পাওয়াটাকে এই খাতের জন্য যথাযথ পুরস্কার বলেই মনে করছেন অনেকেই। তারা এবার সোচ্চার হয়েছেন ব্যক্তি মূল্যায়নের মাধ্যমে এবার যেন তাকে একুশে পদক দেয়া হয়।

সূত্রমতে, সদ্য বিদায়ী বছরের ৬ ডিসেম্বর রাজধানীর আগারগাঁওয়ে বঙ্গবন্ধু আন্তর্জাতিক সম্মেলন কেন্দ্রে (বিআইসিসি) দক্ষিণ এশিয়ার সবচেয়ে বড় এই প্রযুক্তি উৎসবের উদ্বোধনকালে প্রধানমন্ত্রী শেখ হাসিনা দেশে সফটওয়্যার রফতানিতে সাফল্যের কথা তুলে মোস্তাফা জব্বারকে আরও দায়িত্ব দেয়ার কথা বলেছিলেন। এর আগে ২০১৫ সালের আগস্টে দোয়েল ল্যাপটপ প্রকল্পসহ দেশীয় ডিজিটাল ডিভাইস তৈরির উদ্যোগের ব্যর্থতা কাটাতে তথ্যপ্রযুক্তিবিদ মোস্তাফা জব্বারকে টেলিফোন শিল্প সংস্থার (টেশিস) দায়িত্ব দেয়ার নির্দেশনা দেয়া হয়েছিল। যদিও শেষ পর্যন্ত নানা কারণে তা হয়নি। অবশ্য এবার মন্ত্রীত্ব পাওয়ার পর দেশের ডাক, টেলিযোগাযোগ ও তথ্যপ্রযুক্তি বিভাগের পুরো সফলতার দায়িত্বই বর্তালো তার ওপর।

১৯৪৯ সালের ১২ আগস্ট ব্রাহ্মণবাড়িয়া ▶

জেলার আশুগঞ্জ থানার চর চারতলা গ্রামের নানাবাড়িতে জন্মগ্রহণ করেন মোস্তাফা জব্বার। তার পৈতৃক নিবাস নেত্রকোনা জেলার খালিয়াজুরী উপজেলার কৃষ্ণপুর গ্রাম। তার বাবা আবদুল জব্বার তালুকদার পাটের ব্যবসায়ী ও সম্পন্ন কৃষক ছিলেন। তিনি আর মা রাবেয়া খাতুন ছিলেন গৃহিণী।

ঢাকা বিশ্ববিদ্যালয় থেকে বাংলা ভাষা ও সাহিত্যে স্নাতকোত্তর সম্পন্ন করার আগেই ১৯৭২ সালের ১৬ জানুয়ারি সাপ্তাহিক গণকণ্ঠ পত্রিকায় সাংবাদিকতার মাধ্যমে কর্মজীবনে প্রবেশ করেন কমপিউটারে বাংলা লেখার সফটওয়্যারের উদ্ভাবক মোস্তাফা জব্বার। ১৯৭৩ সালে তিনি ঢাকা সাংবাদিক ইউনিয়নের প্রচার ও প্রকাশনা সম্পাদক নির্বাচিত হন। এরপর ট্রাভেল এজেন্টদের সংগঠন আটাবের (অ্যাসোসিয়েশন অব ট্রাভেল এজেন্টস অব বাংলাদেশ) সাধারণ সম্পাদক নির্বাচিত হন। এছাড়া বিভিন্ন মেয়াদে বাংলাদেশ কমপিউটার সমিতির নির্বাহী পরিষদের সদস্য, কোষাধ্যক্ষ ও সভাপতি হিসেবে দায়িত্ব পালন করেন। পাশাপাশি বাংলাদেশ অ্যাসোসিয়েশন অব সফটওয়্যার অ্যান্ড ইনফরমেশন সার্ভিসেসের (বেসিস) প্রতিষ্ঠাতা সহ-সভাপতি ও পরিচালক এবং বাংলাদেশ কমপিউটার ক্লাবের সভাপতি ছিলেন। পাশাপাশি সম্পাদনা করেছেন সাপ্তাহিক ঢাকার চিঠি। বর্তমানে বাংলাদেশের প্রথম ডিজিটাল বাংলা নিউজ সার্ভিস আনন্দপত্র বাংলা সংবাদ বা আবাসের চেয়ারম্যান ও সম্পাদক। ডিজিটাল বাংলাদেশ টাস্কফোর্সসহ তথ্য ও যোগাযোগ প্রযুক্তিবিষয়ক অনেক কমিটির সদস্য এবং কপিরাইট বোর্ড ও বাংলাদেশ কমপিউটার কাউন্সিলের কাউন্সিল সদস্যও এই তথ্যপ্রযুক্তিবিদ।

১৯৮৭ সালের ২৮ এপ্রিল ম্যাকিন্টোস কমপিউটারের বোতাম স্পর্শ করার মধ্য দিয়ে কমপিউটার ব্যবসায় প্রবেশ করেন। সেই বছরের ১৬ মে তিনি কমপিউটারে কম্পোজ করা বাংলা সাপ্তাহিক পত্রিকা আনন্দপত্র প্রকাশ করেন। পরের বছর ১৬ ডিসেম্বর ‘রহস্যময়’ প্রযুক্তির রূপ দেন কমপিউটারে বাংলা লেখার সফটওয়্যারের উদ্ভাবক মোস্তাফা জব্বার। এর মাধ্যমে ১৭৭৮ সালে পঞ্চগনন কর্মকার ও চার্লস উইনকিন্সের হাত ধরে সিসায় তৈরি বাংলা অক্ষর কমপিউটার প্রযুক্তিতে পূর্ণতা লাভ করে। সেটি প্রথমে ম্যাকিন্টোস কমপিউটার ও পরে ১৯৯৩ সালের ২৬ মার্চ উইন্ডোজ অপারেটিং সিস্টেমের জন্যও বিজয় বাংলা কিবোর্ড ও সফটওয়্যার প্রকাশ করেন। এই সফটওয়্যারটি তাকে ইতিহাসের খাতায় উজ্জ্বল করে তোলে। এখনও তিনি ডিজিটাল মাধ্যমের বাংলা ভাষার ব্যবহার নিয়ে আন্দোলনে রত। রোমান অক্ষরের পরিবর্তে বাংলা ভাষার নিজস্বতা নিয়েই ডিজিটাল দুনিয়ায় প্রতিষ্ঠিত করার লড়াই চালিয়ে যাচ্ছেন। ঔপনিবেশিক মানসিকতা থেকে বেরিয়ে নিজ মন্ত্রণালয়ে শতভাগ ‘বাংলা’ ব্যবহারের প্রত্যয় ব্যক্ত করেছেন মন্ত্রীত্ব গ্রহণের পর।

শিক্ষাব্যবস্থায় ডিজিটাল রূপান্তর, স্কুলব্যাগকে জাদুঘরে পাঠানোর স্বপ্নবাজ এই মানুষটি ইতোমধ্যেই বিজয় বাংলা কিবোর্ড ও



সফটওয়্যার উদ্ভাবনের জন্য ভারতের পশ্চিমবঙ্গ রাজ্য সরকারের সেবা সফটওয়্যারের পুরস্কার, পশ্চিমবঙ্গের কম্পাস কমপিউটার মেলার সেবা কমদামি সফটওয়্যারের পুরস্কার, দৈনিক উত্তরবাংলা পুরস্কার, পিআইবির সোহেল সামাদ পুরস্কার, সিটিআইটি আজীবন সম্মাননা ও আইটি অ্যাওয়ার্ড, বেসিসের আজীবন সম্মাননা পুরস্কার, বেস্টওয়ে ভাষা-সংস্কৃতি পুরস্কার, বৃহত্তর ময়মনসিংহ সমন্বয় পরিষদ সম্মাননা, বাংলাদেশ কমপিউটার সমিতির কেন্দ্রীয় কমিটি ও সিলেট শাখার সম্মাননা বিশ্ব মেধাসম্পদ সংস্থার আবিষ্কারক-উদ্যোক্তার স্বীকৃতি এবং অর্থনৈতিক ও মানবিক উন্নয়ন সংস্থার নেত্রকোনার গুণিজন সম্মাননা, রাহে ভান্ডার এনাবল অ্যাওয়ার্ড ২০১৬ (প্রযুক্তিবিদ হিসেবে) এবং অ্যাসোসিয়েশনের ৩০ বছর পূর্তি সম্মাননাসহ ২০টি পুরস্কার ও সম্মাননায় ভূষিত হয়েছেন।

এই কর্মজীবনের জীবনে এখন বাকি রইল একুশে সম্মাননা। ঈশ্বরচন্দ্র বিদ্যাসাগর প্রণীত বাংলা বর্ণমালার ‘বর্ণপরিচয়’ কিংবা সীতানাথ বসাক প্রণীত ‘আদর্শ লিপি’র মতোই ঐতিহাসিকভাবে স্মরণীয় বাংলা কিবোর্ডের ‘বিজয়’-এর জন্যই তিনি এই সম্মাননার দাবিদার বলে মনে করেন তার সুহৃদরা।

সন্দেহ নেই, দীর্ঘদিন ধরে বীর মুক্তিযোদ্ধা মোস্তাফা জব্বার ডিজিটাল বাংলা কিবোর্ড ও

ফন্ট নিয়ে যেভাবে নিরলস কাজ করে যাচ্ছেন, ডিজিটাল মাধ্যমে বাংলা বর্ণমালা নিয়ে যুদ্ধ চালিয়ে যাচ্ছেন, ডিজিটাল ডিভাইসে যুক্তাক্ষর লেখার সহজ সমাধান বাতলে দিয়েছেন, দেশের অনলাইনে, ডিজিটাল সামাজিক যোগাযোগমাধ্যমে সর্বস্তরে বাংলার ব্যবহার নিয়ে দিনের পর দিন অসীম ধৈর্য ধরে নিমগ্ন রয়েছেন তা জাতীয় স্বীকৃতির দাবি রাখে। প্রযুক্তির নিত্যনতুন মাত্রা নিয়ে মোস্তাফা জব্বারের সোচ্চার ভূমিকা এখন জব্বারের ‘বলীখেলা’র মতো আরেক জব্বারের আশ্চর্য ‘বর্ণখেলা’ হয়ে উঠেছে। তার অবদানের ফলেই কমপিউটারের মাধ্যমে মুদ্রণ ও প্রকাশনায় বৈপ্লবিক উত্তরণ এনে দিয়েছেন। শুধু বাংলা বর্ণমালায় নয়; তিনি কমপিউটারে চাকমা লিপিমালা তৈরি করেছেন। এনালগ বাংলাদেশকে ‘ডিজিটাল বাংলাদেশ’-এ পরিণত করতে ছায়া-সঙ্গীর কাজ করছেন ক্লান্তিহীন।

নিজের কর্মসাধনার সড়ক পথে হেঁটেই তিনি আজ বাংলাদেশের মন্ত্রীসভার এক পূর্ণমন্ত্রী। তাও আবার তার প্রিয় স্বপ্নভূমি আইসিটি মন্ত্রণালয়ের। বলা যায়, এর মাধ্যমে তিনি অবতীর্ণ হয়েছেন নতুন আরেক যুদ্ধে। আমরা আশাবাদী তিনি তার অভিজ্ঞতা ও তার লালিত স্বপ্নের পথ চেয়ে এখানেও বিমেক প্রমাণ করবেন একজন সকল ব্যক্তিত্ব হিসেবে।